



Minggu, 26 Nopember 2023

Ogen: Roma 2:5



Ngasuhi Ukur Si Mersik



Adi megermet kita nandangi berita-berita si lit i doni enda, banci saja tersungkun-sungkun ukurta uga nge pagi kedungenna. Sada kasus si asa genduari lenga lit tampukna e me perang negara Palestina ras negara Israel. Perang e terus denga asa genduari, lalap la erkedungen. Puluhen ribu jelma ndai enggo mate i bas perang, anak-anak kebenen bapa nande, keluarga merap marpar, ekonomi surut, tiap wari lit kalak si tangis ras teriluh. Adi siikuti beritana maka negara Indonesia pe enggo mindi mab PBB gelah perang enda min ipengadi. Tapi lalap denga la terrunggui, apai pe radu mersik ukurna. Tuhu, adi mersik ukur la lit dalam damai.

Paulus mpersingeti perpulungen Roma gelah ula mersik ukurna. Kalak si mersik ukur tempa ia akapna sibujurna. Situhuna nina Paulus perpulungen e pe lit nge kesalahenna bagi si ibahan kalak sideban. Adi radu ersalah nge engkai maka iukum kalak sideban? La arusna perpulungen sindaram-ndarami kesalahen ras ngukum temanna. Apai ka seh perang. Dibata nge ngenca metunggung nehken ukumen i bas kesalahen si ibahan perpulungen, sabap tangkas nge ietehNa perukuren ras perbahanen perpulungenNa. Adi tetap mersik ukur perpulungen e, ia mpepulung pernembah ate Dibata guna wari ukumen si ate Dibata ipetangkasna.

Enggo oratna min kita jera, lanai ndarami kesalahen kalak apai ka ikut kita ngukumsa. Labo hakta ngukum jelma i bas kesalahenna, hakta engkelengi ia. Bereken Tuhan erkuasa i bas pusuh gelah nagsup kita erdamai. Sitotoken negara Palestina ras Israel gelah surut ukurna, iperdiatekenna kegeluhen bangsa na ras doni enda si dem perbeben ras aru ate.